

BIER HONNING SOMMERKOLE ALVER SOMMER

Frode og Julie inviterte sommarskulen på biesafari



Fleire møtte opp for å delta på biesafarien tysdag. Foto: Ole Jacob Riise

Av [Ole Jacob Strønen Riise](#)

Publisert:
12.08.21 05:30 ▼

Del

Artikkelen er over 1 år gammel

Barna fekk smake fersk honning hjå paret Frode Emil Brakstad og Julie Odland Skare på Flatøy.

For abonnentar

– Det er 30 barn med oss i dag gjennom Alver kommune sin sommarskule, seier instruktør ved skulen, Ingeborg Hole.

Ho våga ikkje å handtere biene sjølv, men fortel at ho har modige kollegaer som tok på seg draktene for å bli med

på aktivitetane.

– Gruppa har fått prøve seg og barna har storkost seg, så har vi hatt ein liten konkurranse også.

Medan vi snakkar på terrassen, spring ungane rundt, utvekslar Pokémon-kort og leikar.



Instruktørane Ingeborg Hole og Shadi Sif Eddin ved Alver kommune sin sommarskule. Foto: Ole Jacob Riise

– *Har det vore ein hektisk sommar?*

– Både og. Det er utfordrande å halde styr på 30 barn, men det har jo vore utruleg gøy samtidig, svarar Hole.

– Eg har hatt det veldig gøy. Det har nærast vore ferie for meg. Eg har fått dansa, spelt handball og hatt det gøy med barna. Det har vore utruleg kjekt for oss også, legg medinstruktør Shadi Sif Eddin til.



Mie Lunde røkta bier saman med klassekameratane ved sommarskulen. Foto: Ole Jacob Riise

- Mange sinte bier

Mie Lunde Eide var ei av dei som var med på biesafari på Flatøy denne tysdagen.

- Det var mange sinte bier i kuben. Vi fekk lov til å mate dei med sukkervatn medan vi hadde på oss draktene, seier ho.

På safarien lærte ho at det ho først trudde var veps, faktisk er bier.

- Vi fekk også smake på honningen. Det var veldig godt, men eg synest den er betre når dei har gjort ting med den.

- Dette var noko av det kjekkaste eg har vore med på, legg Lunde Eide til.



Her viser Julie Odland Skare fram brett frå ein bikube til barna. Foto: Ole Jacob Riise

Kring 750 barn fekk plass

Avdelingsleiar for ungdom, fritid og medverknad i Alver kommune, Katarina Birkeland, fortel at det er ei lang rekke lag, organisasjonar og aktørar som bidreg med tilbod ved sommarskulen.

– Sommarskulen har over 36 tilbod i kommunen, som golfspel på Fløksand, radiobilkøyring i Knarvik og hundehald på Manger, seier Birkeland.

Ho fortel at biesafarien hjå Frode Emil Brakstad og Julie Odland Skare var del av ei aktivitetsveke der ungane reiser til ein ny stad kvar dag.

I år blei om lag 750 barn og unge tildelt ein plass ved sommarskulen. Birkeland legg til at det er godt å sjå at så mange har engasjert seg for at born og unge skal få ein kjekk sommar.



Frode Emil Brakstad og Julie Odland Skare har bier i hagen på Flatøy. I år arrangerte dei aktivitetsdag for barn ved sommarskolen til Alver kommune. Foto: Ole Jacob Riise

Ville bli bonde, men dette var det næraste ho kom

Det er sambuarane Frode Emil Brakstad og Julie Odland Skare som eig bikubane i hagen deira på Flatøy. Det var Skare som var initiativtakaren då dei bestemte seg for å få seg bier i 2017.

Ho er eigentleg litt allergisk mot bier, men mest mot veps. Til vanleg er ho lærar, medan Brakstad jobbar til sjøs.

– Eg ville eigentleg bli bonde, men eg hadde ikkje gard. Og då var dette det næraste eg kom. No har vi bikubar fire forskjellige plassar – ved Toppe gartneri, på Brakstad, Flatøy og på Husebø, seier Skare.



Skare forsyner seg med litt råhonning rett frå bikuben. Ho trur det var bringebærhonning ungane fekk smake på under besøket. Foto: Ole Jacob Riise

Ho fortel at ungane ved sommarskulen har fått vere med på å markere dronningbiene i kubane med kvit måling. Ho har også gitt ungane ei omvising og litt lærdom om biene.

Saman har paret starta hobbybedrifta Alverhonning, og på fritida sel dei honning under same namn. Ved besøket fekk ungane og instruktørane smake på fersk honning, rett frå kubene.

Les meir om: [Bier](#) [Honning](#) [Sommerskole](#) [Alver](#) [Sommer](#) [Flatøy](#)

Avisa Nordhordland

Lik denne sida13k likar

Sjå kommentarar

Fleire saker

